


Iroun Beretitenti
Thomas S. Monson



Ana Wewete te Tia Kamaiu nakon te Mwakuri n Ibuobuoki

Nikabane ake a tia ni kamatea te numera a ataia bwa terana te tenominaita. Ibukiia Aika Itiaki, iai te boto ni iango ae kabuta are e kabaeira ni kabane. Te boto ni iango ae kabuta anne bon te we-wete nakoira n tatabemaniira nako are ti karekea bwa te tabe inanon abanuean te Atua ikai iaon te aba.

Ko a tia ni kaairua ni ngurengure ngkana te weewete e roko nakoim? Ke ko butimwaaia ma te karabwarabwa ni katoaa rokon weteam ni karaoa te mwakuri n ibuobuoki nakoia tarim ma mwaanem, n ataakina bwa te Tama are i Karawa e na kakabwaiaia te koraki ake E weteia?

I kantaningaia bwa ti na aki kabua oin raoi te tai are e kakaawaki are ti karekea n te mwakuri n ibuobuoki. Oina raoi, bwa te kouru anne are akea tokina, bon titebo ma are e taekinaki iroun te Uea ao ni kuneaki n te Pearl of Great Price: “Bwa taraia, aio au mwakuri ao mimitongiu—ni kakoroa bukin te aki mamate ao te maiu are akea tokina iroun te aomata.”¹

Ti bia ururingngā n aki toki bwa te katabeaki anne ni kaaina ana Ekaretia Iesu Kristo Ibukiia aika Itiaki ni boong aika Kaitira bon tiaki te kamente are uota te karaunano ma bon te kunikai ni karaoan te mwakuri. Tabera, n ikotaki ma kamaiuakira, bon kairakiia tabeman nakon abanuean te Atua are te tiretio.

Man ara anganano ni karaoan te mwakuri n ibuobuoki nakon te Atua, ti na bon aki mena n ana tabo te Cardinal Wolsey n ana karaki Shakespeare. E kabuua

mwaakana imwiin ana mwakuri are e bane iai maiuna nakon ana uea, e bwaebwaeti n nanokaawaki:

Ngkana I beku ibukin te Atua ma tiaki nanou ni koaua N aron are I riai ni beku ibukin au uea, E naaki karokoai n au ririki E a tia ni katukai n akea korakorau nakoia au kairiribai.²

Te aeka ni mwakuri n ibuobuoki raa ae tangiria karawa? “Te Uea e kainanoa te nano ao te iango ae tauraoi, ao ake a anga nanoia man ongotaeka a na kana tamaroaan te aba are Tion inanon boong aika kaitira.”³

I bae ni iangoa ana taeka Beretitenti John Taylor (1808–87): “Ngkana ko aki karaoa raoi am beku, te Atua e na bukiniko ibukiia ake ko a tia ni kamaiuia ngke arona bwa ko a tia ni karaoa raoi tabem.”⁴

N airaon te taura ni kakae ngke kaota otamwaakana ae tamaroa bon maiun Iesu ngke e mwakuri ibuakoia aomata. “I bon mena ibuakomi ake kam mwakuri ibu-kin,”⁵ Iesu e katanoata aio ngke E karekea korakoran bwain rabwataia mwauku, te nooraba nakon mataia matakii, te kona n ongo nakon taningaia bonotaninga ao te maiu nakon rabwataia maate.

Ma te karaki ni kaikonaki ibukin te I-Tamaria ae tamaroa, te Mwatita e reireiniira n tangiriia raora n aiaron bon tangirara ibon iroura.⁶ Ma ana kaeka nakon te tia

kairiiri ae kaubwai, E reireiniira bwa tina kanakoa ara bwatauti.⁷ Ma kamwarekeia aomata aika 5,000, E reireiniira naba bwa ti na taraa kainanoia tabeman.⁸ Ao ma te Kabwarabwara iaon te Maunga, E reireiniira bwa ti na ukoukora moa uean te Atua.⁹

N te Aonaaba ae Boou, te Uea are e a mangauti e katoaata, "Kam atai bwaai ake kam riai ni karaoi inanon au ekaretia; bwa mwakuri ake kam noorai i ni karaoi ao anne ae kam riai naba ni karaoi: bwa te bwai are kam noorai ni karaoi ao anne naba are kam na karaoia."¹⁰

Ti kakabwaiaia tabeman ngkai ti beku inanon nuun "Iesu are te Natareta . . . are e nakonako ni karaoa ae raoiroi."¹¹ Te Atua e kakabwaiaira ni kunea te kimarerei ni beku ibukin Tamara are i Karawa ngkai ti beku ibukiia Natina iaon te aonaaba.

BWAII AIKA A NA TARAAKI

1. Moses 1:39
2. William Shakespeare, *King Henry the Eighth*, act 3, scene 2, lines 456–58.
3. Doctrine ao Covenants 64:34
4. *Teachings of Presidents of the Church: John Taylor* (2001), 164
5. Ruka 22:27.
6. Taraa Ruka 10:30–37; taraa naba Mataio 22:39.
7. Taraa Mataio 19:16–24; Mareko 10:17–25; Ruka 18:18–25.
8. Taraa Mataio 14:15–21; Mareko 6:31–44; Ruka 9:10–17; Ioane 6:5–13.
9. Taraa Mataio 6:33.
10. 3 Nibawai 27:21.
11. Mwakuri 10:38

ANGA REIREI MAN TE RONGORONGO AEI

"[Te Uea] e aki kariaira bwa ti na bwaka ngkana ti karaoa raoi tabera. E na karikirakeira riki e ngae ngkana e riaon ara tarena ao ara konabwai. . . . Bon teuana mai buakon te kabanea n tamaroa ni mwakuri are e kona n roko iroun te aomata" (Ezra Taft Benson, in *Teaching, No Greater Call* [1999], 20). I iangoa tibwauan te mwakuri ae ko a tia n rinanona ke temanna ae ko ataia ae te Uea e a tia ni karikirakea ana tarena ao ana konabwai. Kaoa te utu n tibwaua tabeua aia konabwai aika tamaroa ngke a tia n kaeka nakon "ana wewete te Tia Kamaiu nakon te beku."

RORONRIKIRAKE

Te mwakuri n ibuobuoki n te Tembora

Iroun Benjamin A.

Ngke e koro 17 au ririki, I a moanna n iangoia raoi kanoan au bong aika a na roko, ao I tataro nakon

te Tama are i Karawa tera ae I kona ni karaoia bwa n na tauraoi nakon karaoan te mwakuri ni mitinare ao ni karekea te Nakoanibonga ae te Merekiteraka. I karekea te namakin bwa I riai ni kabatiaa riki nakou nakon te tembora ibukina bwa ana auti te Uea ao e na riki bwa te tabo are I kona n namakina te kabanea ni kaaniaki iai nakon Tamau are i Karawa.

Aingaia are I katea au kouru ae N na karaoa 1,000 te bwabetito inanon te ririki. I kakoaua te namakin ni kainanoan karaoan te kouru aio; I aki mamamatam bwa N na ataia bwa bon aio are I ria ni karaoia. Tamara are i Karawa e kaekaa, ao I a moana nakou nakon te Tampico Tembora ni katoa Kaonobong.

Imwiin are I a tia ni karaoa 500 te bwabetito, I a katea au kouru bwa N na karaoa au kakaae n rongo-rongoia au utu ake au bakatibu, ao I tangira te kakaae aei n te aro ae e rangi ni batia are I aki kona ni mamatu ibukina bwa I kakaia aara. I kunea 50 aara ao waniua te roro n rongorongoia ngkoa au utu; I buoka karaoan te mwakuri n te tembora ibukiia ni kabane.

I karaoa ae raka iaon 1,300 te bwabetito, ao e bane au tai n te tieminari, I karekea te Nakoanibonga ae te Merekiteraka, ao ngkai I a mwakuri bwa te mitinare ae bwanin au tai, are bon teuana au kouru ae te kabanea ni bubura n te maiu aei.

ATAEI

I Kona ni Karaoi Bwaai tabeua ibukiia Tabeman

Ngaira n tatabemaniira nako ti kona ni karaoi bwaai tabeua ibukiia tabeman. Beretitenti Monson e rei-reiniira bwa ti riai n tangiriia ni kabane ao n taraia bwa ti na kangaa ni kona ni buokiia.

Ngkana ko katairiki ma am utu, iangoia a bwa ngaia n tatabemaniia nako a na tibwaua te bwai teuana are teuanne ke neienne e kona ni karaoi ke ni buoka temanna n te bong anne. Korea oin am mwakuri n ibuobuki inanon am tienoro ni katoa bong.



Onimaki, Utu, Buoka

Karaoan te Mwakuri n Tain te Kainano

Tataro muaaka ni kamatebwiaia te bwai n reirei aei, n arona de riai, marorokinna ma aine ake ko kawariia. Kabonganai titiraki bwa a na buokiko ni kakorakoraia aine ao ni karaoa te Bootaki n Aine bwa iteran maium ae kakawaki.

Ngkai ngaira taan kakawara te mweenga, teuana aan ara kakawari aio bon bukan kakorakoran te utu ao te mweenga. Aine ake ti kawariia a na riai ni kona n taekina, “Ngkana iai au kangaanga, I ataia bwa taan kakawara te mweenga a na buokai n aki tataninga titirakinaia.” Bwa ti aonga ni mwakuri, iai tabera bwa ti na ata kainanoia aine ake ti kawariia. Ngkana ti ukoukora te kairi ma ieta, ti na ataia bwa ti na kangaa ni kaeka kainanoia n tamnei ao n rabwata aine ake ti katabeaki bwa ti na kawariia. Imwiina, ni kamanena ara tai, rabakaura, tarena, tataro n onimaki, ao te boutoka ibukin te tamnei ao te namakin, ti kona n ibuobuoki n anga te mwakuri n rainanoanga inanon tain te aoraki, te mate, ao taai aika onoti.¹

Rinanon aia ibuobuoki ribooti mairouia taan kakawara te mweenga, te beretitentii n te Bootaki n Aine e na kinaia ake iai kainanoia aika onoti ibukin aorakiia n rabwataia ke n aia namakin, kabuanibwai aika karina, bung, mate, toaraaia, maroaaia, ke kakaewenako riki tabeua. Te Beretitenti man te Bootaki n Aine ngkanne e na ribootina ana kukune nakon te bitiobi. Iaan ana

kairiiri te bitiobi, ngaia e na ibuobuoki n tararua.²

Ngkai taan kakawari mweenga ngaira ti kona ni iai “mwaitira bukin . . . ni kimareirei” ibukin te kakabwiaia are e a tia ni katokaaki iaora, bwa ti a tia ni karikaki bwa bwainimwakuri inanon bain te Atua ni kakoroa bukin te mwakuri ae kakannato aio” (Aramwa 26:1, 3).

Man Koroboki aika tabu

Mataio 22:37–40; Ruka 10:29–37; Aramwa 26:1–4; Doctrine ao Covenants 82:18–19

Man Ara Rongorongo ni Kawai

Inanon ana moan ririki te Ekaretia, kaain te aro e uarereke ao a bootaki n te tabo ae ti teuana. Membwa a kona n ibuobuoki n te aro ae tawe ngkana iai ae kainnano. N te bong aio mwaitiia membwa e raka iaon 14 te mirion ao e manako ni kabuta te aonaaba. Te kakawari n reirei bon mwakoron ana babaire te Uea ni karekea te ibuobuoki ibukiia Natina ni kabane.

“Ti te tititem are e kona ni karekea te buoka ao te karaunano ni kabuta te ekaretia ae e rangi ni bubura n te aonaaba ae e rangi ni batia arona e

na reke irouia taan beku ake a kaan ma te aomata are e kainnano,” e taku Beretitenti Henry B. Eyring, te Moan Kauntira n te Moan Beretitentii.

“. . . N tatabemaniia nako bitiobi ao beretitenti n te mwaanga iai aia beretitenti n te Bootaki n Aine ni katan iaana,” e reitia. “Iai ana taan kakawara te mweenga, ake a atai kakatai ao kainnanoia aine n tatabemaniia nako. E kona, rinanoia, n atai nanoia n tatabemaniia nako ao n utu. E kona ni katokii kainnano ao ni buoka te bitiobi n ana wewete ni karikirakeia aomata ao utu.”³

BWAII AIKA A NA TARAAKI

1. Taraa Aeniboki 2: Babairean aron Kairan te Ekaretia (2010), 9.5.1; 9.6.2.
2. Taraa Aeniboki 2, 9.6.2.
3. Henry B. Eyring, inanon *Daughters in My Kingdom: The History and Work of Relief Society* (2011), 110.

Tera ae I Kona ni Karaoia?

1. I kamanenai au bwaintangira ao taarena ni kakabwaiia tabeman?
2. A ataia aine ake I tararuia bwa I tauraoi ni buokia ngkana iai kainnanoia?

Ibukin rongorongona riki tabeua, nakon reliefsoociety_lds.org.